

Aen Zijnder Excellencie.

Verthoonen in alder oitmoet ende reverentie die schamele, veriaechde ende gedestruerde personen ende ingesectene van Armuyden, ende met hen het ambacht van Nycuwerkercken ende Mortier, hoe dat zij supplianten, als weesende die overgeblevene personen, Zijnder Excellencie ende der religien toegedaen zijnde, alles hebben moeten verlaten der oirsaken voirschreven, hebbende voer 't geluck moeten kiezen gedult ende patientie in heur vervolghinghe, van derwelcker zij opten 8 Mey 1572 nauwelijcx ende ter grooter noot haer leeven en hebben connen salveren, insonderheyt der oirsaken ommedat zij supplianten — sueckende heure oprechte gouverneur ende heurders vaderlants welvaren voer te staen — die wapene in de handt genomen hadden ende hen Zijnder Excellencie onderworpen omme den bloetdorstige ende tyrannisschen vijandt den Albaen te wederstaen ende uuyten lande te helpen weeren. Daerentegen dat die vijandt met die van Middelborch hen zoe geweldich opgeworpen hebben, dat zij supplianten nyet alleene en hebben moeten vluchte, maer dat daerover mordadelijck ombracht ende gedoot zijn gewordden ettelijck haren supplianten medebroederen, veel vrouwen ende kindere, beroovende ende spolierende daerenbovens die supplianten van alle heure guedcren, soe zij oyck hen met het voirschreven bloet ende goet der vermoorde ende der supplianten nyet versaet vindende, dagelijcx te wercke gegaen zijnde, affgebrooken ende verwuest hebben alle die wooningen der supplianten, oyck heure soutketelen, meer als 60000 gulden weerdich geweest hebbende, beneffens noch 4 lijnbanen, wel 12000 gulden weerdich, ende der kercken tjaerstove, weerdich ontrent 4000 guldenen, nyet gespaert oyck hebbende het gasthuys ende den godthuysse met dry schoone schuttershove, oyck heerlijk gebouwt ende heerlijk gestoffeert. Ende dit al, zoe goet te tasten is, opdat die van Middelburch den burcht van Armuyden tenyete zouden moegen brengen ende ruyneren, zoe zij van Middelborch dacromme over veel jaeren gearbeyt hebben, zoe genoeg notoir is, ommedat Armuyden bequamer havenen heeft en den coopman gerieffelicker ter zeevaart liggende is dan Mid-

delburch, hen nyet bevredigende metten rijckelijcken gaven ende neringhe, daerinne zij in alder weelde floreerden, meynden na de voirschreven destructie alle neeringhe ende profijten alleen zonder barmhertticheyt te incorporeren, sonder te bedencken, dat der Conincklijcke Maiesteyt daeracne veel te cort geschiede, als gheen bequamer havene in alle Zijne landen hebbende als Armuyden voirschreven, zonder oyck te overleggen, dat zij supplianten metten anderen ingesetenen des voirschreven borchs van Armuyden der Conincklijcke Maiesteyt van alle sacken zoe sware lasten ende ongelt van chijsen ende ander incommen waren betalende als d'ingesetenen van Middelborch, die in beslootene [muc]ren bevrijt saten ende boven maten zeer domineerden ende rden, dagelijcx inslickende meest alle die amb[chtshee]rlichen metten eylants gronden van erfiven, daerinne gelegen. Ende diewijle dan, Genadighe Heer, die van Middelborch die grontlijke ende die cenighe oirsake zijn, nyet alleene van der ruyne des voirschreven burchs Armuyden, maer oyck van de voirschreven moorden ende van der gansche verderffnisse der supplianten, dewelcken alsoe de supplianten het middel van heure geruyneerde huysen te herbauwen benomen hebben, ende dat jammer, jae een groote schade ware, dat alsulcke borch ende schoone havene nyet herbauwt ende bewoont en zoude wordden, soc keeren die supplianten hen in alder oitmoet tot Zijnder Excellentie, oitmoedelick biddende, dat den goeden wille van Zijnder Excellentie zoude moeghen wesen tgene voirschreven is te behertsighen ende tot opbauwinghe des voirschreven burchs ende ten onderstande der supplianten de supplianten te ontslaen, te quiteren ende te bevrijden van allen renten, chijsen ende schulden, die de rebellen van Middelborch — emmers die omme der religien daeruuyte nyet gewecken en zijn — zouden bynnen Ermuyden ofte opt ambachte van Nyeuwerkercken ende Mortier moeghen heffen, blijvende daer uuytgesondert alle die eyghen huysen ende erfgronden der voirschreven rebellen. Latende daerenboven hen supplianten peyselijck ende vredelijck volghen die guederen, die zij in Middelborch zijn hebbende, consenterende ende octroyerende hen daeromme voordane zonder verbitteringhe oirdentlijck te leeven, dat men van nu voordane bynnen Armuyden alle coopmanschappen ende neeringhen zal moeghen gebruycken, alsoe men in andere omliggende plaetssen is vermoegende ende doende, stellende aldaer eene behoirlijke wet met allerley persoonen, daertoe noodich ende bequaem,

omme aldaer kennisse te nemen van allen questien, die aldaer ende in de voirschreven ambachten van Nyeuwerkercken ende Mortier zouden moeghen rijsen ofte geproponeert worden, die te hoofde beroepen zelen moegen wordden aen den Raet des Conincx in Hollandt ende den Hooghen Rade tot Mechelen, ende totten dyen hen supplianten ofte der wet — in der maniere voorschreven te stellen — te octroyeren ende te auctoriseren, dat zij van nu voirdaen totten ontfanck van alle incommen, als chijnsen ende anderssins, selen moegen stellen ontfangers, die dezelve selen ontfanghen tot behoeve des voorschreven borchs, midts doende der Conincklijcke Maiesteyt reeckeninghe ende bewijs ende van't seste part het reliqua. Daerinne mede begrijpende ende besluytende die soutmate, diewijle dezelve bynnen Ermuyden bequamer sal vallen te verpachten ende uuyt te gheven als tot Middelburch, midts daervan tot proffijte des Conincx mede betalende het seste deel ende oyck midts contri-buerende in alle ordinarisse beden ende lasten des gemeynen lants gelijk h[eur]je naebueren. Dwelck doende, zelen die supplianten nyet alleene alle devoir doen omme die opbauwinghe van Ermuyden voirschreven, maer sullen den almechtighen Godt bidden voer den gelucksalighen voerspoot ende het langduerich leeven van Zijnder Excellentie.